

Aningaasarsianit akileraarutit pillugit Inatsisartut inatsisaata allannguutissaa pillugu Inatsisartut inatsisissaattut siunnersuut nr. xx, xx november 2000-imeersoq.

§ 1

Aningaasarsianit akileraarutit pillugit Inatsisartut inatsisaanni nr. 5-imi 19. maj 1979-imeersumi, kingullermik Inatsisartut inatsisaatigut nr. 3-kkut 23. maj 2000-imeersukkut allanngortinneqartumi makku allannguutigitinneqassapput:

1. § 17 b imatut oqaasertaqassaaq:

"§ 17 b. Soraarnerussutisiatigut inuunermullu sillimmasiissutitigut aaqqissuussinernut ingerlaavartumik inuuneq tamaat, toqunikkut unittussanik, pisartagaqarfigineqartartussanut akilersuutit, tamakkununga ilanngullugit aapparisaq imaluunniit inooqatigisap qitornallu soraarnerussutisiassanik pisartagaqartinnissaannut kiisalu innarluutilittut ingerlaavartumik soraarnerussutisiassanik akilersuutit aningaasarsiat akileraaruteqaataasussat naatsorsorneranni ilanngaatigineqarsinnaapput. Taamaattorli piumasarisat makku naammassineqarsimassapput:

1) Aaqqissuussinerit pilersinneqarsimassapput soraarnerussutisiaqalernissamut aningaasaateqarfimmi sillimmasiisarneq pillugu inatsimmi ilaatinneqartumi. Aamma aaqqissuussinerit pilersinneqarsinnaapput selskabimi inuunermut soraarnerussutisiaqalernissamullu sillimmasiisarfimmi ingerlatsinissamut Finanstilsynimit akuerisaasumi,

2) utoqqalineq pissutigalugu soraarnerussutisiani inuuneq naallugu pisartagassanik, naammaataasunillu inuuneq naallugu pisartagassaannngitsunik aningaasartaqartuni, utoqqalineq pissutigalugu soraarnerussutisiat ilaannit inuuneq naallugu pisartagaasunit tunniunneqartut 50 procentiinit amerlanerussanngillat,

3) utoqqalineq pissutigalugu soraarnerussutisiat siusinnerpaamik tunniunneqartalersinnaapput 60-inik ukioqalernermi, taakkuninnga ukiukinnerunissaq Skatterådimit akuerineqarsimanngippat,

4) aapparisaq katissimasamut imaluunniit inooqatigisamut toqukkuq qimagaasut, katissimasamut avissimasamut imaluunniit inooqatigisimasamut. Inooqatigisaaq tassaavoq inuk aterorlugu taasaq akilersuilernermi toqusup illoqatigisimasaa, imaluunniit inuk toqusup katissimasinnaasaralua imaluunniit pisortatigut nalunaarsukkamik inooqatigisimasaa kingornussassat nalunaarsorneqarfiat toqusup toqunissani qaammatinik pingasunik sioqqullugu pilersissimasaa tunngavigalugu kingornutassaqalersimasooq kingornussisarneq pillugu inatsit naapertorlugu aapparisaq katissimasap pinngitsoorani kingornutassarissassaraluata minnerpaamik

angeqqataanik, aammalu toqusup toqunissaa sioqqullugu ukiuni marlunni illoqatigisimasaa imaluunniit siusinnerusukkut toqukkut qimaguttumik illoqateqarsimasooq sivikinnerpaamik atasuinnarmik ukiuni marlunni, ineqarfik ineqatigiiffigisaq taamaallaat ineqatigiiffigineqarunnaarsimappat paaqqinniffimmut inissinneqarneq pissutigalugu, tamatumani ilanngullugu utoqqalisut inigisartagaannut nuunneq,

5) aapparisaq katissimasap, aapparisaq avissimasap imaluunniit inooqatigisap qimataasup soraarnerussutisiat pisartagarisinnaavai sivikinnerpaamik ukiuni qulini,

6) taamaattorli qitornanut toqukkut qimagaasunut, aamma qitornarsianut, soraarnerussutisariatit pisartagaritinneqassapput sivisunerpaamik qitornaasut 24-nik ukioqalernerat tikillugu, aamma

7) soraarnerussutisiatigut inuunermullu sillimmasiutitigut aqqissuussinerit danskit soraarnerussutisiaqalernissamut inuunermullu sillimmasiissutitigut danskit selskabiini pilersinneqarsimasut soraarnerussutisiat akileraaruserneqartarnerat pillugu inatsimmi §§ 50 aamma 53 A-mut ilaassanngillat.

Imm. 2. Inuunermut sillimmasiisoqarpat sillimmasiisoq sillimmasersimassaaq sillimmasiutinullu piginnittuussalluni.

Imm. 3. Taamaattorli ingerlaavartumik inuuneeq tamaat tunniunneqartartussat ukiumut 6.000 kruunit sinnersimangippatigut soraarnerussutisiaqartitsinerimi aqqissuussanit, imm. 1-imi taaneqarsimasunit, atorfinitsitaanermullu atsumik pilersinneqarsimasunit, tunniunneqartussat aningaasanngorlugit ataasiaannartumik tunniunneqarsinnaapput.

Imm. 4. Taamaattorli aningaasat soraarnerussutisiaqalernissamut aqqissuussinernit soraarnerussutisiaqalernissamut aningaasaateqarfinni imaluunniit inuunermut soraarnerussutisiaqalernissamullu selskabini Kalaallit Nunaanni angerlarsimaffeqartuni pilersinneqarsimasut ukiuni tulleriinni marlunni tunniuttagassat nalingi, aammalu atorfeqarnermut tunngatillugu pilersinneqarsimasut, ataasiaannartumik tunniunneqarsinnaapput."

2. § 17 c imatut oqaasertaqassaaq:

"§ 17 c. Soraarnerussutisiaqalernissaaq siunertaralugu naafferartumik akilersuilluni sillimmasiutit akiliutit aningaasarsiat akileraarutaasussat nalunaarsorneranni ilanngaatigineqarsinnaapput aalajangersagaqarpat aningaasat sillimmasiutit sivikinnerpaamik ukiuni qulini amerlaqatigiiaarlugit tunniunneqartassasut aammalu sillimmasersimasooq inuutillugu tunniunneqartut inummut pineqartumut tunniunneqartarata. Taamaattorli piumasaqaatit makkua naammassineqarsimassapput:

1) Isumaqatigiissut pilersinneqarsimassaaq inuunermut soraarnerussutisiaqalernissamullu sillimmasiisarneq pillugu selskabimi Kalaallit Nunaanni angerlarsimaffeqartumi aammalu inuunermut sillimmasiisarfirmik ingerlatsinissamut Finanstilsynimit akuerineqarsimasumi,

2) Sillimmasersimasup 60-inik ukioqalereernerani isumaqatigiissut taamaallaat pilersinneqarsinnaavoq isumaqatigiissummut taamatut ukioqalerneq sioqqullugu pilersinneqarsimasumut ilassutit, aammalu isumaqatigiissut siulleq eqqarsaatigalugu piffissanut tunniussivissanut tunngatillugu tunniuttakkat sillimmasiutit amerlassusissaata siusinnerusukkut isumaqaatigiissutaasimasup affaa sinnerlugu amerlassuseqassanatik,

3) sillimmasiutinik pisartooq sillimmasersimassaaq sillimmasiutinillu piginnittuulluni.

Sillimmasiutit pilersinneqarsimappata sulisuusup sulisitsisuatalu isumaqatigiissuteqarneratigut akiliutillu sulisitsisup akilertarpagit sulisuusoq sillimmasersimassaaq sillimmasiutinillu piginnittuulluni, aamma

4) Sillimmasersimasup 80-inik ukioqalereernerani piffissamik tunniussivissamik isumaqatigiissutip siulliup ulluanit kingusinnerusumik tunniussisarnissamik isumaqatigiissuteqartoqarsinnaanngilaq. Naafferarlugu tunniussuineq aallartissinnaavoq siusinnerpaamik sillimmasersimasup 60-iliineraniit, ukiukinnerunissaq Skatterådimit akuerineqarsimanngippat. Taammaattorli isumaqatigiissutigineqarsinnaavoq tunniussuineq aallartissinnaasoq sillimmasersimasoq innarluuteqalersimappat 60-illuunniit angunagit toqusimappat.

Imm. 2. Isumaqatigiissummi salliutinneqarsinnaasutuaapput sillimmasersimasup "qaniginerpaasai" sillimmasiutit isumaqatigiissutigineqartarnerat pillugu inatsisip paasineqariaasia, inatsimmi tassani § 105, imm. 5, naapertorlugu, imaluunniit sillimmasersimasup aapparisaat katissimasaa, avissimasaa, inuk aterorlugu taasaq sillimmasersimasup sillimmasermermi nalaani illoqatigisimasaa, sillimmasersimasup inuuneq tamaat kingornussisussai, qitornarsiai imaluunniit qitornarsiat inuuneq tamaat kingornussisussai."

3. § 17 d imatut oqaasertaqassaaq:

"§ 17 d. §§ 17 b aamma c-mi aaqqissuussinerit malillugit akileeqaataassutinit akilikkanit ilanngaatit piffissamat akiliiffimmut innersuunneqassapput, aammalu ilanngaatit ukiup ilaani pineqartumi akissarsiat katillugit 15 procentiannit amerlanerussanngillat. Aappariinnut ataatsimoortumik akileraartartunut imaluunniit inooqatigiinnut nalunaarsugaasunut tunngatillugu ilanngaat katillugit akissarsiat 15 procentiannit annerussanngilaq. Namminersorlutik inuussutissarsiummik ingerlatsisunut tunngatillugu naatsorsuinermi tunngaviussaaq pissuseqataanik atorfillip akissarsiaasa missingerferneqarnerat.

Imm. 2. Sulisuusup akissarsiaasa akileraaruteqaataasussat naatsorsorneranni ilaassanngillat aningaasat §§ 17 b aamma c-mi aaqqissuussinernut taaneqartunut sulisitsisup akilersimasai.

Imm. 3. Ukiup akissarsiorfiusup ingerlanerani soraarnerussutisiaqalernissamat aaqqissuussinermut ingerlaavartumik tunniussisartussamat § 17 b, tunngavigalugu imaluunniit naaferartumik sillimmasiivimmu § 17 c, tunngavigalugu akissarsiat katillutik 15 procentiat sinnerlugu akiliisoqarsimappat imm. 1, naapertorlugu Akileraartarnermut Pisorta qarfiup akuerisinnaavaa taanna qaangerlugu akiliutit utertinneqarnissaat immikkut ittunik patsisissaqarsimappat."

4. § 17 d-p kingornanut una ilanngunneqassaaq:

" § 17 e. Aningaasarsianut akileraaruteqaataasussanut ilanngunneqassapput:

- 1) Soraarnerussutisiaqalernissamat aaqqissuussinermut ingerlaavartumik tunniussisartussamat soraarnerussutisiat § 17 b, imm. 1, kiisalu § 17 b, imm. 3 aamma 4 malillugit aningaasat tunniunneqartartut piginnittumut namminermut, aapparisaanut katissimasaanut inooqatigisaanulluunniit, tamatumani ilanngullugit aapparisaq avissimasaq kiisalu inuuneq naallugu kingornussisussat, qitornarsiat imaluunniit qitornarsianit inuuneq naallugu kingornussisussat,
- 2) soraarnerussutisiaqalernissaq siunertaralugu naafferartumik sillimmasiutinit tigusartakkat § 17 c, tunngavigalugu aaqqissuussinermi atugassarititat naapertorlugit naafferartumik tunniunneqartartut sillimmasersimasumut kiisalu sillimmasersimasup

toqoreerneratigut naafferartumik tunniuttakkat, tassa kikkut salliutinneqarnissaat pillugu malittarisassat malillugit tunniunneqartarpata pineqartup aapparisaanut katissimasaasut imaluunniit inooqatigisaanut, tamatumani ilanngullugit aapparisaq avissimasaq imaluunniit inuuneq naallugu kingornussisussat, qitornarsiat imaluunniit qitornarsianut inuuneq naallugu kingornussisussanut, aamma

3) soraarnerussutisiaqalernissamut aaqqissuussinermi ingerlaavartumik tunniussisartumit soraarnerussutisiat § 17 b, imm. 1, kiisalu § 17 b, imm. 3 aamma 4 malillugit tunniuttakkat aammalu soraarnerussutisiaqalernissaq siunertaralugu naafferartumik sillimmasiutinit tunniuttakkat § 17 c, malillugu piginnittup katissimallugu aapparisaanut avissimasaanut averusersimasaanulluunniit tunniunneqarpata najugaqatigiinnermi pigisat agguarneqarnerata kinguneranik.

Imm. 2. Naafferartumik tigusartakkat sillimmasiinnermit § 17 c-mi pineqartumit pisut isertitatut akileraaruteqaataasussaapput, tigusartakkat inunnut imm. 1, nr. 2-mi taaneqarsimanngitsunut tunniunneqartaraluarpataluunniit.

Imm. 3. Soraarnerussutisiaqalernissamut aaqqissuussinermi ingerlaavartumik tunniussisartumit maanaannaq unitsinneqartumit soraarnerussutisiaqalernissamut aningaasaateqarfimmi imaluunniit inuunermut soraarnerussutisiaqalernissamullu selskabimi Kalaallit Nunaanni angerlarsimaffeqaanngitsumi pilersinneqarsimasumiit tunniuttakkat isertitatut akileraaruserneqassapput, taamaattorli takuuk § 17 f, imm. 5.

Imm. 4. Naafferartumik sillimmasiutinit inuunermut soraarnerussutisiaqalernissamulluunniit selskabimi pilersinneqarsimasumit maanaannarlu unitsinneqarsimasumit Kalaallit Nunaannilu angerlarsimaffeqaanngitsumit tunniuttakkat isertitatut akileraaruserneqassapput, taamaattorli takuuk § 17 f, imm. 5".

5. § 17 e-p kingornanut una ilanngunneqassaaq:

" **§ 17 f.** Aningaasarsiat akileraaruteqaataasussat naatsorsorneranni ilanngunneqassanngillat nammineq aamma/imaluunniit sulisitsisup tjenestemandit soraarnerussutisiassaattut aamma Arbejdsmarkedets Tillegspensionimut akiliutaasimasut.

Imm. 2. Ingerlaavartumik tunniuttakkat aaqqissuussinermi imm. 1-imi taaneqartumit pisut aningaarsianut akileraaruteqaataasussanut ilanngunneqassapput.

Imm. 3. Akissarsiat akileraaruteqaataasussat naatsorsorneranni ilanngunneqassanngillat soraarnerussutisiaqalernissamut aaqqissuussinerni danskit aningaaseriiviini assigisaannilu erniatigut isertitat soraarnerussutisiat akileraaruteqaataanissaat pillugu inatsimmi kapitai 1-imut atasut kiisalu Lønmodtagernes Dyrtdsfondimiititat.

Imm. 4. Akissarsiat akileraarusigassat naatsorsorneqarneranni ilanngunneqassanngillat sulisitsisup soraarnerussutisiaqalernissamut aaqqissuussinernut pisortani atorfilinnut tunngatitani akileeqataassutai, taakkua ilusilersorneqarsimappata naafferartumik sillimmasiussatut, soraarnerussutisiaqalernissaq siunertaralugu naafferartumik sipaakkatut, indeks malillugu katersatut, kapitalforsikringitut aamma kapitalpensionitut, aaqqissuussineq pinngitsoorani sulisorisamit malitassaasimappat akileraartussaanerlu sioqqullugu pilersitaasimappat. Aaqqissuussinermi soraarnerussutisiat akileraaruserneqartarnerat pillugu inatsimmi § 50 imaluunniit § 53 a-mut tunngasunngortitaasimappat sulisitsisup akileeqataassutai saneqqunneqarsinnaanngillat.

Imm. 5. Akissarsiat akileraaruteqaataasussat naatsorsorneranni

ilanngunneqassanngilaq soraarnerussutisiaqalernissamut aaqqissuussinerit maanaannaq unitsitat nalingat, aaqqissuussinerit soraarnerussutisiat akileraarusersugaanerat pillugu inatsimmi kapiati 1-imut atanngippata."

6. § 17 f-p kingornanut una ilanngunneqassaaq:

"§ 17 g. Akissarsiat akileraarusigassat naatsorsorneqarneranni ilanngunneqassapput inuunermut sillimmasiutinit soraarnerussutisiaqalernissamullu aaqqissuussinerit iluanaarutit § 17 b-mi imaluunniit § 17 c-mi ilaanngitsut. Akissarsianit akileraartussaataapput piginnittoq imaluunniit piginnittup toqunerata kingornatigut sillimmasiutinit tiguisinnaatitaasoq. Iluanaarut naatsorsorneqassaaq illuatungaatigut ukiup akissarsiviup naanerani sillimmasiutit nalingat ukiup ingerlanerani tiguisimasanik ilallugit illuatungaatigullu ukiup akissarsiviup aallartinnerani sillimmasiutit nalingat ukiup ingerlanerani akiliutaasimasunik ilallugu. Sillimmasiutinit amigartoorutaasut taamaallaat ilanngaatigineqarsinnaapput ukiuni aningaasarsiviusuni tulluuttuni tallimani sillimmasiutit taakkorpiat iluanaarutitaannit § 21, imm. 1-imi malittarisassat malillugit.

Imm. 2. Inuunermut sillimmasiutinit il.il. ilanngullugit tigusartakkat imm. 1-imut atasut aningaasarsiat akileraaruteqaataasussat naatsorsorneqarneranni ilaatinneqassanngillat tunniuttakkat ingerlaavartut pineqanngippata.

Imm. 3. Taamaattorli imm. 1-imi 2-milu malittarisassat atortuunngillat inuunermut sillimmasiutinit il.il. aatsaat tunniunneqarsinnaappata sillimmasersimasup toqunerani innarluuteqalerneraniluunniit sillimmasersimanerup sivirususissaanik isumaqatigiissutip naannginnerani, imaassimanngippat qaqugu piffissap naanissaa pillugu isumaqatigiissut sillimmasersimasoq 80-inik ukioqalereersimanngippat isumaqatigiissutip siulliup kingornatigut.

Imm. 4. Aningaasarsiat akileraaruteqaataasussat naatsorsorneqarneranni ilanngunneqassanngillat inuunermut sillimmasiutinit tunniussat, tamatumani ilanngullugit innarluuteqalernerami aningaasanngorlugit tunniussat inuunermut sillimmasiutinit imm. 3-mi pineqartunit pisut aammalu ajutoornermi sillimmatinit pisut.

Imm. 5. Aamma imm. 1-imi 2-milu malittarisassat atuutinngillat soraarnerussutisiaqalernissaq siunertaralugu naafferartumik sillimmasiutinit naafferartumillu katersanut, indeksforsikringinut, indeksopsparinginut, kapitalforsikringinut kapitalpensioninullu soraarnerussutisiat akileraarusersorneqarnerat pillugu inatsimmi kapitali 1-imi pineqartunit.

Imm. 6. Skatterådip inuunermut sillimmasiutit il.il. imm. 1 aamma 2 malillugit akileraarutissaajunnaarsissinnaavai inuunermut sillimmasiut pilersinneqarsimappat sillimmasiisoq Kalaallit Nunaanni akileraartartussaanngikkallartillugu."

7. § 17 g-p kingornanut una ilanngunneqassaaq:

"§ 17 h. Soraarnerussutisiaqalernissamik isumaqatigiissutip imaluunniit soraarnerussutisiaqalernissamut aningaasaateqarfiit aamma inuunermut soraarnerussutisiaqalernissamullu selskabit Kalaallit Nunaanni najugaqavissut akornanni nuussinerit akiliutit isertitatulluunniit suliarineqassanngillat nuussinermi pineqarpata:

1) soraarnerussutisiaqarnermut aaqqissuussinerit ingerlaavartumik tunniussisartut akornanni, § 17 b, naapertorlugu.

2) Naafferartumik sillimmasiutit § 17 c, malillugu soraarnerussutisiaqalernissamut

aaqqissuussinermut ingerlaavartumik tunniussisartumut tunngasut § 17 b, malillugu imaluunniit

3) naafferartumik sillimmasiummiit taamaaqataanut nuussinerit § 17 c. malillugu.

Imm. 2. Skatterådip akuerisinnaavaa aningaasat nunani allani sillimmasiisarnermut aaqqissuussinerniit nuunneqartut soraarnerussutisiaqalernissaq pillugu aaqqissuussinernut § 17 b imaluunniit § 17 c-mi pineqartunut akiliutitut suliarineqassanngitsut.

Imm. 3. Imm. 1-imit 2-mut malittarisassat atortinneqarnissaannut tunngaviuvoq nuussineq sioqqullugu aningaasat nuutat pillugit isertitanit akileraartussanngortitsisoqarsimassanngitsoq akitsuusiisoqarsimassanngitsorluunniit."

8. § 17 h-p kingornanut una ilanngunneqassaaq:

"§ 17 i. Soraarnerussutisiaqalernissamut aaqqissuussinermut ingerlaavartumik tunniussisartumit aammalu soraarnerussutisiaqalernissamut aningaasaateqarfimmi imaluunniit inuunermut soraarnerussutisiaqalernissamulluunniit selskabimi Kalaallit Nunaanni angerlasimaffeqartumi pilersitaasumi maanaannakkut unitsitat tunniutassat akitsuuserneqassapput 45 procentimik.

Imm. 2. Naafferartumik sillimmasiutit maanaannakkut unitsitaasut tunniunneqartarnerat aammalu inuunermut soraarnerussutisiaqalernissamullu sillimmasiinerneq selskabimi Kalaallit Nunaanni angerlarsimaffeqartumi pilersinneqarsimasut akitsuuserneqassapput 45 procentimik.

Imm. 3. Imm. 1 2-lu atorlugit tunniussinernut naligiissitaapput allamut tunniussineq imaluunniit allamut pigisassanngortitsineq qularnaveeqqutissatulluunniit tunniussineq kiisalu iliuutsit il.il. aaqqissuussinernut ilanngaaticinnissinnaanermut piumasqaatinik naammassinnissinnaajunnaarneranik kinguneqartut, taavalu 45 procentimik akitsuuserneqassapput aningaasat allamut tunniussinernut iliuuseqarnerulluunniit nalaani aaqqissuussinernut atorunnaarnerani tunniunneqarsinnaagaluartut, immaqa akeqanngitsumik isumaqatigiissutip assigisaataluunniit nalinganut.

Imm. 4. Imm. 1-3-mut malittarisassat atussanngillat pigeqatigiitanik aapparissamut agguaassinerneq. Agguaassinerneq kingornatigut aapparissaq nammineerluni akileraartartunngussaqaq imaluunniit pissarseqataassutiminit akitsuutinut akiliisussanngussaqaq, aammalu § 17 c, imm.2-mi malittarisassat malillugit salliutitatut inississinnaalluni.

Imm. 5. Akitsuutinik akiliisussaataasup pisussaaffigaa soraarnerussutisiaqalernissamut aningaasaateqarfik imaluunniit inuunermut soraarnerussutisiaqalernissamut sillimmasiinerneq selskabi iliuutsit imm. 3-mi taaneqartut pillugit piaartumik ilisimatissallugu."

9. § 17 i-p kingornanut una ilanngunneqassaaq:

"§ 17 j. Soraarnerussutisiaqalernissamut aningaasaateqarfiup imaluunniit inuunermut soraarnerussutisiaqalernissamullu selskabip tunniussisussap § 17 i malillugu akitsuut tigussavaat Akileraartarnermullu Pisortaqaqarfimmut akilerlugu soraarnerussutisiaqalernissamut aningaasaateqarfiup imaluunniit inuunermut soraarnerussutisiaqalernissamullu sillimmasiinerneq selskabip akitsuutinut akiliisussaataanermeq paasisaqarnerata kingornatigut kingusinnerpaamik qaammatip ataatsip qaangiunnerani.

Imm. 2. Soraarnerussutisiaqalernissamut aningaasaateqarfik imaluunniit inuunermut soraarnerussutisiaqalernissamulluunniit sillimmasiinermit selskabi akitsuummik unitsitsisussaannerminik naammassinninngitsaq, imaluunniit aningaasanik ikippallaanik unitsitsisoq aningaasat amigaataasut akilernissaannut toqqaannartumik landskassimut akisussaasunngussaaq, soraarnerussutisiaqalernissamut aningaasaateqarfiup imaluunniit inuunermut soraarnerussutisiaqalernissamullu sillimmasiinermit selskabip uppersarsinnaanngippagu inatsimmi matumani aalajangersakkat qarsupissimanagit. Soraarnerussutisiaqalernissamut aningaasaateqarfik imaluunniit inuunermut soraarnerussutisiaqalernissamullu sillimmasiinermit selskabip aningaasat uninngatitassat landskassimut akilertussanngussavai. Akiligassat akilersinneqarsinnaapput inatsimmi matumani malittarisassat malillugit.

Imm. 3. Akitsuutip Akileraarnermit Pisortaqarfimmut akilerneqarnissaanut malittarisassat sukumiinerusut Naalakkersuisut aalajangissavaat."

10. § 25 l-p kingornanut una ilanngunneqassaaq:

"§ 25 m. Skatterådip akuerisinnaavaa imm. 2-4-mut malittarisassat atorneqassasut suli inuutilluni suliffeqarfiup ilaataluunniit qitornanut, ernuttanut, qatanngutinut imaluunniit qatanngutit ernutaannut tunniunneqarnissaat, tunniussisoq piginnittunngortorlu Kalaallit Nunaanni tamakkiisumik akileraartussaataappata § 1, imm. 1, nr. 1 malillugu. Qitornavissiarisimasat qitornarsiallu ilaqtavittut isigineqarput.

Imm. 2. Suliffeqarfiup pigisai nalillit tunniunneqarpata akileraarusigassatut nalingannik annerusumilluunniit nalilerlugit, kisiannili nalinginnaasumik nioqqutigissagaanni nalissaraluannit appasinnerusumik, piginnittunngortoq akissarsiat akileraaruteqaataasussat naatsorsorneranni akileraarutitigut nalikillisaatissanut kiisalu iluanaarutit akileraaruserneqarnerannut aamma tunisnermi ajunaarutit ilanngaatigineqarsinnaanerannut tunngatillugu piginnittoq inissisimassaaq soorlulusooq pigisat nalillit piginnittunngortumit pissarsiarineqarsimasut piginnittuusimasup nalimini akiligaatut akeqartillugit. Tunniussisup akileraarutitigut nalikillisaatigisimasinnaasai piginnittunngortup suliarisimasaatut isigineqassapput. Tunniussisup pigisat nalillit inuuniutiminut iluanaarnerminullunniit atatillugu pissarsiarisimappagit iluanaarutit annaasalluunniit pigisat nalillit tuneranni pilersut piginnittuulersumit suliaasut taassuma aningaasarsiaasa akileraaruteqaataasussat naatsorsorneqarnerannut ilanngunneqassapput imaassimappat iluanaarutit annaasalluunniit tunniussisup isertitaasa akileraaruteqaataasussat naatsorsorneqarneranni ilanngunneqartussaasimagaluartut taassuma pineqartut tunisarisimappagit.

Imm. 3. Akileraarutitigut kingornussinermit imm.2, naapertorlugu, taarsiullugu tunniussisup piginnittunngortullu toqqarsinnaavaat suliffeqarfiup allamut tunniunneqarnerani iluanaarutit annaasallu nalunaarsussallugit suliffeqarfiit allamut pigisassanngortitaaneranni malittarisassat nalinginnaasut malillugit, suliffeqarfiup pigisai nalillit nalit imm. 2-mi taaneqartut sinnernagit tunniunneqarsimagaluarpataluunniit.

Imm. 4. Ukiumi pigilernerata siulianiittumi amigartoorutit piginnittuulersup suliffeqarfiup tignerani iluanaarutinit ilanngaatigisinnaanngilai."

11. § 34 a imatut oqaasertaqassaaq:

"§ 34 a. Inuk § 1 malillugu akileraartussaataaasoq umiarsuarmi Dansk Internationalt Skibsregisterimi nalunaarsorsimasumi Kalaallit Nunaatalu imartaani angalasuunnigitsumi sulinermigut akissarsisimappat akileraarutaanut ilanngaataassapput aningaasat qanoq akissarsiaqarneranut tunngasut.

Imm. 2. Malittarisassamut imm. 1-itimiittumut ilaavortaaq inuk § 1 malillugu akileraartussaataaasoq umiarsuarmi usinik angallassissummi Dansk Internationalt Skibsregisterimi nalunaarsugaasumi sulinermigut akissarsisimasooq, aammalu Kalaallit Nunaata nunallu allat akornanni aalajangersimasumik usinik angallassinermi inuttaasoq, tamatumani ilanngullugit Danmarki Savalimmiullu.

Imm. 3. § 1-imi malittarisassamut ilaavortaaq inuk § 1 malillugu akileraartussaataaasoq umiarsuarmi usinik angallassissummi 1.100 bruttotonnage taannaluunniit qaangerlugu usitussusilimmi Dansk Internationalt Skibsregisterimi nalunaarsugaasumi aammalu umiarsuarmi usinik angallassissutini imm. 2-mi taaneqartuni Kalaallit Nunaanni umiarsualivimmiit umiarsualivimmut usinik aalajangersimasumik angallassinermi inuttaanermigut akissarsiaqartoq kiisalu oliamik assartuutini 450 bruttotonnage taannaluunniit qaangerlugu usitussusilimmi."

12. § 59-p kingornanut una ilanngunneqassaaq:

"§ 59 a. § 17 i malillugu akitsuutinut tunngasut Akileraartarnermut Pisortaqarfiup aalajangiiffigisassavai. Akileraartarnermut Pisortaqarfiup aalajangigai pisortaqarfimmut qulliunerusumut ingerlateqqinneqarsinnaanngillat. Akileraartarnermut Pisortaqarfiup aalajangiineri Grønlands Landsrettimut siullermeertumik suliassatut tunniunneqarsinnaapput pineqartup aalajangiinermik ilisimatinneqarneraniit qaammatit arfinillit qaangiutsinnagit. Immikkut patsisissaqarsimappat Landsdommerip tunniussineq akuerisinnaavaa piffissarititaq qaangerneqarsimagaluarpalluunniit. Unnerluutigineqartussaapput Naalakkersuisut."

13. § 82-imi immikkoortutut nutaatut ilanngunneqassaaq:

Imm. 8. Akitsuutit § 17 i malillugu akilernerqartut nakkassapput landskassimut, kommunitumut akileraarfiusumut kommuninullu § 27 malillugu ukiumi akileraarfiusumi akileraarutit procentiat aalajangerneqarsimasooq tunngavigalugu, § 28 malillugu ukiumi akissarsiviusumi 1. januarimi inuttussuseq tunngavigalugu akileraarutit procentissaata nalilernerqarnera aammalu § 28 a malillugu ukiumi akissarsiviusumi akileraarutit procentissaat aalajangerneqarsimasooq tunngavigalugu."

14. § 94 a, imm. 1 imatut oqaasertaqassaaq:

"Inuup sullivimmik ingerlatsinerminut tunngatillugu ernianut akiliissutissanik tigusaqartup imaluunniit erniaqartussanik taarsigassarsisitsisup taarsigassarsianilluunniit ingerlatitseqqittup akileraarutissat amerlassusilerneqarnissaannut atugassatut ukiut tamaasa qinnuvigineqanngikkaluarluni akileraartarnermut pisortat ilisimatissavai erniat tunniunneqartut iluanaarutaasulluunniit annertussusiannik kiisalu ukiumi qaangiuttumi kontomik piginnittunut ataasiakkaanut erniatigut tunniunneqarsimasut akiligassanngorsimasulluunniit amerlassusiat, ernialiinerup ullua kiisalu ukiup qaangiuttup naanerani aningaasat tigumiat akiitsutilluunniit annertussusiat.

Paasissutissiinissami piunasaavortaaq kontut il.il. ukiup ingerlanerani atorunnaarsimasut nalunaarutigineqarnissaat."

15. § 97, imm. 1 imatut oqaasertaqassaaq:

"Malittarisassat Naalackersuisut aalajangersagaat malillugit soraarnerussutisiaqalernis-samut aningaasaateqarfiit, inuunermut soraarnerussutisiaqalernissamullu sillimmasiisarnermut selskabit allallu soraarnerussutisianik imaluunniit inuunermut tunngatillugu sillimmasiutininik ingerlaavartumik tunniussisartut akileraartarnermut qullersaasut ukuninnga ilisimatittassavaat:

- 1) Akileeqaataassutit akiliutillu annertussusiat,
- 2) Soraarnerussutisiaqalernissamut aaqqissuussinerit § 17 b-mi c-milu taaneqartut tunngavigalugit tunniuttakkat,
- 3) Ilaasortaajunnaarnermi tunniussat, utertillugu pisiarinninnerup nalingi aaqqissuussinerillu tamakkua malillugit bonusit aamma
- 4) § 17 e, imm. 5-imi iliuutsit taaneqartut, taakkua soraarnerussutisiaqalernissamut aningaasaateqarfiup, inuunermut soraarnerussutisiaqalernissamullu sillimmasiisarnermut selskabit il.il. ilisimalersimappagit."

16. § 107, imm. 1 imatut oqaasertaqassaaq:

"Taamatut § 101-imi taaneqartutut pillarneqassaaq kinaluunniit piaaraluni mianersuaalliorujussuarluniluunniit:

- 1) Akileraarutininik A-nik imaluunniit iluanaarutisianit akileraarutininik unerartitsinissaminik naammassinninngitsoq,
- 2) piffissaagallartillugu akileraarutininik unerartitanik akiliinngitsoortoq,
- 3) piffissaagallartillugu § 42, imm. 3-mi aamma § 71-imi taaneqartutut ittunik paasissutissiinngitsoortoq,
- 4) pissutsit § 42, imm. 3-mi imaluunniit § 71-imi taaneqartut pillugit eqqunngitsunik imaluunniit paasinerluisitsisinnaasunik paasissutissiisoq,
- 5) § 17 i, imm. 2 malillugu akitsuutip tigusinnaanut pisussaaffimmik sumiginnaaneq, imaluunniit
- 6) § 17 i, imm. 1 malillugu akitsuummik tiggummigallakkamik piffissaagallartillugu akiliinnginneq."

17. § 107, imm. 3 imatut oqaasertaqassaaq:

"Imm. 3. Taamatullu § 101-imi taaneqartutut pillarneqassaaq kinaluunniit:

- 1) Aningaasarsianik A-nik imminut tunniussisitsisoq nalunngikkaluarlugu peqqussutigineqartutut Akileraarutininik unerartitassanik unerartitsivigineqarsimanningsunik,
- 2) piaaraluni mianersuaalliorujussuarluniluunniit § 37, imm. 4 aamma 5, § 40, imm. 6, § 45, § 47, imm. 6 imaluunniit § 48 malillugit aalajangiinermi atugassanik eqqunngitsunik paasinerluisitsisinnaasunilluunniit paasissutissiisoq imaluunniit paasissutissanik qinnuteqaatit aalajangersakkani taakkunani taaneqartut ilaannut atasunik apeqqutip aalajangiiffiginiarnerani pingaaruteqarsinnaasunik nipangiussiinnartoq, imaluunniit
- 3) § 17 i, imm. 5-mi taaneqartutut nalunaaruteqanngitsoorneq".

§ 2

Inatsit atortuulerpoq 1. januar 2001-imi.

Kalaallit Nunaanni Namminersornerullutik Oqartussat, ulloq xx 2000.

Jonathan Motzfeldt

/

Josef Motzfeldt